

衝事業 踩入飲食界

龔嘉欣有「婚」數 目標做視后

龔嘉欣近年除幕前演出，更涉足飲食界，去年與日籍蛋糕烘焙大師兼緋聞男友松岡哲也合作開餐廳，郎才女貌相當合襯。嘉欣開口想結婚生仔，但就不會主動求婚，亦不會設定結婚歲數，想在事業上衝刺，若有機會做視后便覺得人生很圓滿。

採訪：梁靜儀 攝影：黃艾力

去年龔嘉欣與陳豪合演劇集《新四十二章》，以及與張振朗主演的《靈戲逼人》，均成為無綫去年收視排第4名的其中兩套劇，後者更在「亞洲影藝創意大獎」中贏得「最佳喜劇節目」殊榮。嘉欣坦言很開心觀眾喜歡《靈》劇：「因為除咗搞笑，仲有好多感動位，最開心係觀眾鍾意，反應係我哋意料之外。」她與張振朗正為續集度橋，組織好故事便向監製Sell橋。上一輯悲劇收場，續集會否想大團圓結局？她坦言鍾意悲劇收場：「我好衰，我好鍾意悲劇，最尾個心一定要『搵』一『搵』，會印象深刻啲。」

與緋聞男友合作有拗撬

除了幕前演出，嘉欣同時還要兼顧餐廳生意，去年她與松岡哲也合作開餐廳，她表示生意OK，但未計數是否已回本。愛親力親為的她不用開工便會到餐廳幫手，她說：「我鍾意落去同同事傾偈，佢哋真係好辛苦。有時見佢哋食飯、去洗手間嘅時間都有，盡量幫到就幫，始終我都有正職。」訪問時嘉欣不時接聽員工電話，老闆娘的確不易為。

因劇集在大灣區播映，令內地觀眾認識嘉欣，問到可想趁機在大灣區開分店？她坦言能力上暫時未做到：「依家我要兩邊兼顧覺得係有啲難度，所以唔敢諗住。」問到與緋聞男友松岡哲也合作可有拗撬？她承認二人曾有拗撬：「我個人鍾意有咩都直接講出嚟商量，大鬧就一定唔會，大家都成熟，想解決件事。」

眼見身邊閨蜜相繼搵到好歸宿，34歲的嘉欣亦開口想結婚生仔：「不過唔係咁容易囉，加上未有對象，同埋要諗對方嘅諗法係點。（會主動求婚？）我鍾意被求婚多啲。」嘉欣笑言以前想過25歲結婚，之後就推遲到30歲，現在不再設限期，想在事業上衝刺。問到是否想贏視后才結婚？她坦言：「我覺得擺咗就圓滿啲，但擺獎牽涉天時、地利、人和。」

談到新年願望，她坦言現在沒想太多反而更開心，有工作便盡力去做好，過好每一天，覺得人漸長大開始接觸生老病死，沒有東西比健康更緊要。



■張振朗與龔嘉欣均想《靈戲逼人》開拍續集。



■龔嘉欣希望先結婚再生B。

■松岡哲也與龔嘉欣傳緋聞。

■王梓軒與石祐珊合作無間。

落敗《超星團》有遺憾 張鎬濂等妹妹成年組團出道

張鎬濂昨日到新城電台接受訪問，獲母親洪欣陪同到場，但洪欣笑言充當兒子助手，故沒一起接受訪問。提到張鎬濂於《亞洲超星團》未能入圍成團，他坦言比賽時很大壓力，結束後感覺「成個人鬆晒」：「但當然會唔捨得，未能入圍成團亦感到可惜同遺憾，不過都戔佢哋開心，肯定會約大家再聚。」談到未來動向，他希望多在港發展，問到想以男團還是個人身份發展？他說：「我希望未來可以多拍戲，之前參加男團想博一博，但遺憾做唔到，但我仍抱住一份初心同夢想，因為我好鍾意跳舞，唔會放低。」

談到妹妹張晞彤很靚女，會否也想入行？張鎬濂笑言：

「我都覺阿妹好靚，而且佢受我影響，視我為偶像，鍾意唱歌又成日拍片，好有表演天分。」

問到想不想兄妹組團？他笑言有興趣：「不過妹妹依家先10歲，等佢18歲先，尚有一段時間。」

■張鎬濂希望多留港發展。

王梓軒監製新劇 搵泰國影帝幫拖

王梓軒昨日以大會主持及監製身份出席香港國際影視展 (Filmart) 2024「中劇趨勢研討 擘開新劇盛宴」發布會，他宣布將與石祐珊首次攜手監製新劇《網內人：復仇代幣》，預計今年秋季開拍。問到會否主演？他幽默說：「有啲尷尬，若然佢哋唔揀我就係精明，揀我就係識

做，哈哈！當中有一至兩個角色屬意由泰國、馬來西亞或日本演員演出，我喺會上見到泰國影帝 Anada Everingham 幾適合。（搵石祐珊媽媽薛家燕參演？）呢部係懸疑劇，都驚嚇親家燕姐，不過會注入少少喜劇同動作元素，就交界石祐珊重金禮聘家燕姐參演，一個鏡頭都好。」

■王梓軒與石祐珊合作無間。

敖嘉年想拍恐怖片

敖嘉年、關伊彤與陳國峰等昨日出席寬娛娛樂與紀得娛樂香港影視展聯合發布會，兩間來自台灣地區的娛樂公司公布多個電影、劇集、綜藝及動畫製作計劃。近年積極參與幕後製作的敖嘉年欣賞兩間台灣公司與內地有良好關係，自爆手頭上有好劇本可與兩間公司傾合作。問他最想拍什麼類型電影？他說：「我好想拍恐怖片，雖然喺TVB拍過，但要劇情令觀眾估唔到，能夠嚇到觀眾先叫好。我平時都最鍾意睇恐怖片，一個人入戲院睇都有問題。」

■敖嘉年與關伊彤結伴出席發布會。

